

四庫全書

史部

欽定四庫全書

欽定宗室王公功績表傳卷九

傳七

貝勒

和碩貝勒阿敏傳

阿敏

顯祖宣皇帝孫追封莊親王舒爾哈齊第二子初授台吉

歲戊申三月

太祖命同長子褚英征烏拉宜罕山城克之斬千人獲甲

三百俘其衆以歸癸丑正月從

上征烏拉布占泰以三萬衆迎拒諸將欲戰

上止之阿敏偕貝勒代善等奏曰布占泰已出舍不戰何

耶

上遂決進克其城滅之丙辰

太祖建元天命封和碩貝勒以齒序阿敏為二貝勒四年

三月從

上破明兵于薩爾滸山及尚間崖復奉

命禦明總兵劉綎于棟鄂路代善等繼之陣斬綎阿敏偕
大臣扈爾漢擊敗明遊擊喬一琦兵一琦奔固拉
庫崖與朝鮮都元帥姜功烈合營阿敏同諸貝勒
攻之功烈降一琦自縊八月從

上征葉赫滅之六年三月從

上取明瀋陽遼陽七月鎮江城軍陳良策叛投明將毛
文龍阿敏遷鎮江沿海居民于內地十一月文龍
屯朝鮮阿敏渡鎮江夜入朝鮮境斬其守將及兵

千五百文龍僅以身免十一年四月征喀爾喀巴
林部取所屬屯寨十月征扎魯特部俘其衆天聰
元年正月同貝勒岳託等征朝鮮瀕行

諭曰朝鮮屢世獲罪理宜聲討然此行非專伐朝鮮也明
毛文龍近彼海島納我叛民故整旅徂征如朝鮮可取
並取之因

親授方略是月大軍薄義州拔其城分兵搗文龍所居鐵
山文龍敗歸海島師克宣州連定三城次平壤朝

鮮王李侔遣使請和阿敏書數其罪七次黃州侔復
請和阿敏欲進攻諸貝勒議許之事詳克勤郡王
傳凱旋

上郊勞于武靖營

賜御衣一襲五月從

上征明錦州復圍寧遠擊斬千餘人四年正月大兵克永
平灤州遷安三月

命阿敏代貝勒濟爾哈朗等駐守師至合略迤西路並招

降榛子鎮四月諭歸降漢文武官曰我國法度從來賄賂不行廉者舉之貪者勿錄況

皇上簡用者俱廉潔忠直之輩爾等若有罪雖賂千金無益若無罪即衆貝勒何懼焉五月明監軍道張春等圍灤州阿敏怯不往援灤州陷阿敏遽棄永平殺降者夜出冷口歸六月

上御殿諸貝勒大臣議阿敏十六罪

上命岳託宣示于衆諸貝勒大臣合詞請誅阿敏

詔特宥其死削爵幽禁崇德五年十一月卒于幽所爵除

多羅誠毅貝勒穆爾哈齊傳

穆爾哈齊

顯祖宣皇帝第二子以功

賜號誠毅歲乙酉四月從

太祖高皇帝征哲陳部嘉哈部長蘓庫賚呼密告哲陳部

主於是托摩和章嘉巴爾達薩爾許界藩五城集

兵以待

上執麾前進穆爾哈齊及近侍延布祿烏靈阿皆奮勇直

入重圍斬二十餘級敗其衆涉渾河走穆爾哈齊
復隨

上渡河躡其後至吉林崖見兵由旁徑來

上慮為彼見去冠纓隱身以待射前至者一人貫脊而殪

穆爾哈齊復射殪其一餘多墜崖死

太祖曰今日之役以四人敗八百衆

天助我也天命五年九月卒年六十

上親奠順治十年六月追封多羅貝勒謚曰勇壯爵除

多羅篤義貝勒巴雅喇傳

巴雅喇

顯祖宣皇帝第五子初授台吉歲戊戌正月

太祖命同長子褚英征安楚拉庫路夜取屯寨二十降萬
餘人

賜號篤義丁未四月

命征東海窩集部取赫席赫鄂謨和蘇嚕佛訥赫托克索
三路俘二千人天命九年九月卒年四十有三順

治十年五月追封多羅貝勒謚曰剛果爵除

多羅廣畧貝勒褚英傳

褚英

太祖高皇帝第一子初授台吉歲戊戌正月

上命征安楚拉庫路以功

賜號洪巴圖魯尋封多羅貝勒初東海瓦爾喀部斐悠城

長策穆特赫苦烏拉布占泰之虐乞移家歸附丁

未正月

命同貝勒舒爾哈齊代善率兵徙之軍夜行陰晦忽大霧

上有光衆以為異捫視無有復建之光如初舒爾
哈齊曰吾幼從

上征討所閱事多矣未見此異疑非吉兆欲班師褚英同
代善持不可曰吉凶兆已定遽還何以報

命決進抵斐悠城收其屯寨五百戶令大臣扈爾漢衛之
先行兵僅二百布占泰以萬衆邀諸路傷我一人
大將揚古利斬其七人乃卻褚英與代善至策馬
前諭軍士曰

上每征伐無不以少擊衆今雖未親行間我等奉

命來此爾衆無憂昔擒布占泰宥歸俾主其地時不久背
恩如故今豈不能再縛之衆皆曰願効力褚英遂
與代善各率兵五百夾擊天方晴明忽大雪寒冽
烏拉兵大敗斬其統兵貝勒生擒貝勒常住瑚哩
布及常住之子死者相枕藉獲馬五千甲三千

上以褚英率先敗敵嘉之復

賜號廣略戊申三月同貝勒阿敏征烏拉宜罕山城克之

布占泰與蒙古科爾沁貝勒翁阿岱合兵出烏拉
城二十里遙望我軍知不可敵相約還復以失宜
罕山城大懼遣使來盟乙卯閏八月褚英以罪伏
誅爵除

多羅貝勒芬古傳

芬古

顯祖宣皇帝孫追封莊親王舒爾哈齊第八子天聰五年
三月授鑲藍旗都統八月隨

上征明抵大凌河芬古率本旗兵圍城之西南時貝勒阿
濟格敗明兵於松山

上將幸其營城中兵來突芬古等夾擊大敗之九月

上令軍士向錦州幟而馳如明援兵狀距城十里礮聲不

絕總兵祖大壽統衆出西南隅攻軍臺芬古等迎擊大壽敗回不敢出七年六月

詔問征明與朝鮮察哈爾三者何先奏言我軍蓄銳已久勢可用宜即入明邊毀其城保戮力進取何憂無成八年七月從

上征明同貝勒德格類進師獨石口七月克長安嶺殺其守備官攻赤城克其郭復入保安州謁

上於應州城籍俘獲以獻九年五月

次定四車全書

騰蛟等克其城八年十月駐防錦州十二月卒年三十有九順治十年五月追封多羅貝勒諡曰靖定乾隆十五年七月以曾孫德沛襲封和碩簡親王贈如其爵

初次襲尚善追封靖定貝勒芬古第二子順治元年四月襲封輔國公十月晉封固山貝子二年正月隨豫親王多鐸南征至潼關賊李自成以騎三百橫衝我師尚善與貝勒尼堪敗之三月平河南

五月渡江平江南尚善並在事有功

賜圓補紗衣一襲金百兩銀五千兩鞍馬一五年八月隨英親王阿濟格勦天津土寇殲之十二月駐防大同六年十月晉封多羅貝勒九年二月掌理藩院事十月預議政十五年正月隨信郡王多尼征明桂王朱由榔於雲南薄其城由榔奔永昌尚善同征南將軍卓布泰進鎮南州破其將白文選於玉龍關渡瀾滄江下永昌由榔先遁乘勝取騰越州

進勦南甸至孟村而還十六年六月

賜蟒袍一玲瓏刀一鞍馬一十七年七月議尚善預撤永
昌守門兵致軍入城傷百姓降固山貝子康熙十
一年閏七月

諭宗人府尚善性行端良凡事小心敬慎勤勞為國著仍
復多羅貝勒十二年六月任宗人府右宗正十三年三
月以疾罷宗正是時逆藩吳三桂反

上命順承郡王勒爾錦由荊州進征六月復

命尚善為安遠靖寇大將軍率師之岳州速滅賊尚善至
軍移書三桂其略曰王以亡國餘生乞師我
朝殄殲賊寇為國雪恥為父復讐感我

聖恩傾心報國蒙

恩眷顧列爵分藩榮施後嗣忠孝慈義之節炳於天壤富
貴寵榮之盛絕於近代迄今三十餘年矣而末路
晚節復效童昏頓喪初心自取顛覆竊為王不解
也何者王藉言興復明室則曩者大兵入關奚不

聞王請立明裔且天下大定猶為我計除後患剪
滅明宗安在為故主効忠哉將為子孫謀創大業
則公主額駙曾偕至滇其時何不遽萌反側至遣
子入侍乃復背叛以陷子戮可謂慈乎如欲光耀
前人則王之授誠也祖考皆膺封錫今則墳塋毀
棄骸骨遺於道路可謂孝乎為人臣僕迭事兩朝
而未嘗忠於一主可謂義乎不忠不孝不義不慈
之罪躬自蹈之而欲逞志角力收復人心猶厝薪

於火而云安結巢於幕而云固也諺曰老將智而
耄及之王非老諄何乃至是如即輸誠悔罪

聖朝寬大應許自新毋蹈公孫述彭寵故轍赤族湛身為
世大僂三桂得書不報十一月疏請發荊州綠旗
兵撥京口沙唬船五十並赴岳州進剿從之十四
年六月賊犯彝陵急遣舟師絕其餉道十五年三
月以舟師敗賊於洞庭取君山四月分遣兵助安
親王岳樂攻長沙十六年正月征南將軍穆占由

岳州赴長沙深入賊境

命尚善率水陸兵進援四月三桂奔衡州復進湘潭分遣其衆侵兩粵尚善請發鳥船四十精兵每佐領四名水陸夾擊十七年二月

諭責尚善殄賊緩令率所部每佐領五人駐守長沙而以岳樂統大軍取岳州尚善願統舟師克岳州自効上從其請遣湖廣總督蔡毓榮率標兵三千荊州綠旗兵二千馳赴岳州協擊六月賊將杜輝犯柳林嘴大

軍迎擊君山扁山舟師亦至合戰賊敗走斬獲甚衆賊固守套湖峽總兵萬正色等又擊破之捷

聞下部議叙八月薨於軍年五十有八十九年十一月廷議出師湖廣功罪尚善坐退縮追削爵

二次襲門度原封貝勒尚善第四子康熙七年正月封鎮國公二十五年十一月任宗人府右宗正三十七年四月以惰削鎮國公時門度之弟鎮國公根度亦以乖張削爵五月

諭大學士等門度根度乃貝勒尚善之子今兩公爵俱革
尚善別無公爵之子孫則其爵遂絕矣著交宗人府議
尋議奏門度之祖芬古係輔國公門度應襲公爵
得

旨門度著襲封輔國公雍正四年十一月以病削爵

三次襲裕綬原封貝勒尚善孫原封鎮國公根度
第四子康熙五十五年正月授三等侍衛雍正四
年十一月襲封輔國公尋授散秩大臣九年五月

管正藍旗覺羅學十三年十一月任宗人府左宗
正乾隆五年十月卒年五十有二謚曰敏恪

四次襲嵩椿敏恪輔國公裕綬第六子乾隆六年
二月襲封奉恩輔國公十二年四月授散秩大臣
十三年二月任正紅旗漢軍副都統閏七月授正
藍旗護軍統領十四年五月遷鑲黃旗漢軍都統
兼左翼前鋒統領十五年四月調鑲黃旗蒙古都
統十月任宗人府右宗人十九年四月署領侍衛

內大臣十二月管理鑾儀衛事二十二年正月授
荊州將軍二十五年十二月調西安將軍二十六
年十一月授察哈爾都統二十七年閏五月復任
西安將軍二十九年十一月與副都統成德互叅
議嵩椿徇私保題官屬又不將違例放債之沙爾
圖及坐扣錢糧之佐領朱林泰究叅等罪革任回
京三十年正月任散秩大臣十二月授綏遠城將
軍三十一年十二月以不裁轎夫餉銀革任三十

三年九月署領侍衛內大臣十月任正紅旗蒙古
都統三十五年四月任右宗人三十六年六月授
內大臣三十七年十一月授江寧將軍四十六年
三月調綏遠城將軍四十九年六月調寧夏將軍

多羅安平貝勒杜度傳

杜度

太祖高皇帝孫原封廣略貝勒褚英第一子初授台吉天命九年正月喀爾喀巴約特部台吉恩格德爾請移居東京杜度隨大貝勒代善等徙其戶口來歸尋封貝勒天聰元年正月同二貝勒阿敏貝勒岳託等征朝鮮李侗請和諸貝勒許之阿敏欲直趨至其都謂杜度可同往杜度變色曰

皇上乃吾叔父何可遠離耶遂與岳託等議定盟而還二

年二月

上征多羅特部杜度留守三年十一月從

上征明薄京城敗滿桂侯世祿又同貝勒阿巴泰等焚通

州克張家灣從

上至薊州敗敵援兵事具英親王傳十二月

命杜度統本旗兵駐遵化四年正月明兵來攻敗之斬其

副將獲駝馬千計五年三月

命諸貝勒直言時政杜度奏曰讞獄務求明允請別選賢
能聽訟必事理是非斟酌悉當者庶有成效七月

上征明杜度留守六年四月

上征察哈爾復留守七年三月監築鱣場城五月明將孔
有德耿仲明來降杜度等迎護其衆事具英親王

傳六月

詔問證明及朝鮮察哈爾三者何先奏言朝鮮已在掌握
且緩征察哈爾與我逼則征之破則天下自然膽

裂若尚遠取大同邊地秣馬乘機深入明境八年

五月

命駐防海州崇德元年四月叙功晉封多羅安平貝勒九

月守海州河口伊勒慎奏明將造巨艦百餘橫截

遼河為戰禦計

命杜度濟其師明兵敗却乃還十二月

上征朝鮮杜度護輜重後行

諭簡精騎略皮島雲從島大花島鐵山至則居民先遁杜

度焚其廬舍二年二月抵臨津江前一日聞冰解
不可渡夕大雨雪冰復凝軍數萬徑渡狀聞

上曰嘉祥游至皆

天意也是月同睿親王多爾袞取江華島敗其水師再敗
其兵于江岸克其城三年二月

上征喀爾喀同代善濟爾哈朗等留守并監築遼陽都爾
弼城是月明石城島總兵沈志祥挈屬降杜度運
米濟之八月

命岳託為揚威大將軍杜度副之統右翼軍伐明抵密雲
東北牆子嶺明兵迎戰敗之進攻牆子嶺保分兵
入破明黑峪關古北口黃崖口馬蘭峪等關岳託
以疾薨于軍杜度總軍務與左翼會于通州河西
越北京西抵山西南抵濟南降城克敵事具睿忠
親王傳四年四月凱旋

賜駝一馬二銀五千兩八月

命掌禮部事九月同貝勒濟爾哈朗等略明錦州寧遠五

年四月

上巡視義州杜度留守六月同睿親王等于義州屯田七月杜度率右翼兵伏寧遠路殺明運糧兵三百人尋往錦州誘敵敗其兵八月獲大凌河海口船九月代還十二月圍錦州餘詳睿忠親王傳六年三月以聽從睿親王離城遠駐遣兵私回論削爵奪所屬戶口

詔從寬罰鍰六月復往圍錦州敗明兵于松山八月從

上親征九月

駕旋留杜度圍錦州七年六月薨年四十有六病革時諸

王貝勒方集

篤恭殿會議出征功罪

上聞之罷朝訃至

命護軍統領圖賴往奠雍正二年立碑以旌其功

初次襲杜爾祜安平貝勒杜度第一子初封輔國
公崇德四年七月有蒙古及漢人自伊魯逃杜爾

祐駐兵藩城屏城間伺之不獲而還議削爵

詔免之六年八月從

上圍松山明兵遁諸將相繼追擊杜爾祐疑後有敵兵少
待已而無至者遂隨衆追破之七年三月隨大軍
圍錦州祖大壽以城降

命杜爾祐還京六月降襲鎮國公十月以叅領拜山等首
告怨望削爵黜宗室順治元年十月隨豫親王多
鐸南征二年二月仍入宗室封輔國公十月叙功

賜金五十兩銀二千兩五年九月隨鄭親王濟爾哈朗征
湖廣六年四月敗賊于永興抵辰州賊渠一隻虎
遁追擊之進勦廣西定全州餘詳鄭獻親王傳七
年正月凱旋叙功

賜銀六百兩八年二月晉封多羅貝勒九年十月
命議政十二年二月卒年四十有一諡曰愍厚

二次襲敷達愍厚貝勒杜爾祜第五子順治十二
年八月降襲固山貝子康熙十三年十月卒年三十

有二謚曰恪恭

三次襲普貴恪恭貝子敦達第二子康熙十三年十二月降襲鎮國公三十七年四月

諭宗人府察行走勤惰議奏普貴原有瘋疾今雖愈不便令其行走應革退得

旨普貴向來行走尚優既稱瘋疾已痊著照常行走雍正元年十月以病削爵

四次襲智保原襲鎮國公普貴第十一子雍正元

年十月降襲輔國公三年二月卒年七歲

五次襲蘇保原襲鎮國公普貴第十三子雍正三年正月襲封輔國公四年十二月卒年四歲

六次襲誠保原襲鎮國公普貴第七子雍正五年二月襲封輔國公乾隆十九年九月卒年四十有三諡曰溫禧

七次襲慶春溫禧輔國公誠保第二子乾隆二十年二月襲封奉恩輔國公三十八年六月卒年二

十有四

八次襲恒寧奉恩輔國公慶春第一子乾隆三十
八年十月襲封奉恩輔國公

多羅貝勒察尼傳

察尼

太祖高皇帝孫豫通親王多鐸第四子順治十三年正月
封多羅貝勒康熙七年正月授宗人府左宗正七
月預議政九年三月充

玉牒館副總裁十二年十二月逆藩吳三桂反

命隨順承郡王勒爾錦由湖廣進勒叅贊軍務十三年三
月至荊州賊已陷岳州七月察尼同將軍尼雅翰

進征偽將軍吳應麒以賊七萬由陸路來拒敗之
斬級甚衆舟師抵七里山以礮攻沉其船十餘因
溽暑風逆仍回荊州十四年五月賊陷穀城察尼
佩靖寇將軍印往援都統伊里布等先至賊遁時
南漳興山為賊陷又逼彝陵據城外鎮荊山扼壕
結寨八月察尼至彝陵以賊寨難進攻其糧由江
運議增舟師斷賊運困之十月遣兵敗賊于牛皮
了口進攻黃連坪焚其積聚興山賊遁十五年二

月吳逆移南漳彝陵賊往長沙順承郡王令察尼
回荊州渡江勦賊三月同都統伊里布等趨石首
縣賊據虎渡口迎戰敗之追至太平街斬級三百
餘泊江南岸翼日再登岸擊賊過太平街遇賊伏
失利退荊州

詔責勒爾錦老師糜餉察尼叅贊無能令立功贖罪十七
年八月貝勒尚善薨于岳州軍

命察尼代為安遠靖寇大將軍規復岳州九月疏言舟師

入湖三月餘雖未大挫賊鋒賊亦不能出戰近聞
賊餉將絕宜于湖水涸後圍以木柵立木椿列火
礮俾小船巡警以困之然水涸為期尚遲兩三月
間賊中安知無變今乘水勢未退立一營于南津
港俟水涸酌撥舟師營于君山高家廟絕其糧道
賊勢窮蹙不難撲滅

上善其言令副都統關保率兵赴岳州聽調遣是月遣提
督桑額協同撫遠將軍彰泰率師至南津港大敗

賊衆十一月奏僞將軍杜輝已養元姜義舟師犯
陸石口將軍鄂訥等敗之斬千餘級署副都統葉
儲赫等進攻岳州破賊萬餘又疏言賊屯岳州偵
知其糧已匱以舟師悉出意在通餉道鏖戰移時
偽帥復率衆五千自高家廟渡江來犯增遣前鋒
統領杭奇禦退之先是察尼以舟師屢經出戰疏
請發江南子母等礮一千又請調荊州水師總兵
張忠并標兵營君山高家廟

上皆從之至是又疏言湖水漸涸陸地漸土我兵營伍隔絕恐賊潛通饋餉請增發滿漢兵議政王等議不准行

上以圍取岳州關係重要賊糧將絕令安親王岳樂以長沙閒駐兵量調赴之十八年正月疏請調兵六千圍岳州城并請設隨征左右前後四營總兵官分轄

詔允之是月偽總兵王度冲陳珀等各以舟師降吳應麒

棄城遁復岳州計招撫偽官六百餘兵五千餘獲
船六十五礮六百四十餘二月安親王自長沙進
取衡州察尼發綠旗兵沙船助其軍尋奏都統珠
滿追擊賊於湘陰斬獲無算復其城提督桑額取
安鄉降偽員外郎等三人

命察尼由常德進征辰龍關軍務在澧州以南者聽調度
十九年三月同都統鄂訥等攻克辰龍關抵辰州
賊潰遁偽知府傅祖祿等以城降並招撫偽將軍

楊有祿周禎揚寶蔭祖述舜等五月疏言自常德
進辰沅沿途雨澤馬乏

詔暫屯沅州酌量進發六月疏計在軍前鋒四百有奇護
軍驍騎每佐領二十餘人應簡前鋒三百每佐領
護軍六驍騎九進取雲貴

上命彰泰統師進征察尼領先出征効力勞苦之滿洲兵
還京十一月議察尼出師湖廣退縮不速扼要害
應削貝勒及議政宗人府職籍其家屬財產仍行

拘禁

上念克岳州功僅削爵為閒散宗室二十四年十二月
特授奉天將軍二十七年九月卒年四十有八喪至京
命領侍衛內大臣公費揚古往奠祭葬如輔國公例謚曰
恪僖爵除

多羅貝勒喀爾楚渾傳

喀爾楚渾

太祖高皇帝曾孫追封克勤郡王岳託第三子順治元年
四月隨睿親王多爾袞入山海關破流賊李自成
追擊至望都二年二月封鎮國公三年正月隨肅
親王豪格討流賊張獻忠時賊黨據陝西同貝子
滿達海進勦偽叅將石國璽以下五十餘人率賊
七百迎降賊首高如礪遁三台山掘壕圍之如礪

亦率衆降十一月肅親王進征四川斬獻忠于西
充喀爾楚渾在事有功五年八月任鑲紅旗滿洲
都統六年正月隨敬謹親王尼堪討大同叛鎮姜
瓌師至太原賊由寧武關迎戰遣都統阿賴等敗
之進圍寧武賊犯我鑲紅鑲黃兩旗營擊敗其衆
四月由左衛往圍大同偽總兵楊振威斬瓌降十
月晉封多羅貝勒八年二月攝理藩院事八月薨
年二十有四諡曰顯榮立碑紀功康熙十三年三

月復立碑旌之

初次襲克齊顯榮貝勒喀爾楚渾第一子順治九年十月襲封多羅貝勒康熙六十一年六月薨年七十有二

二次襲魯賓貝勒克齊第一子康熙二十三年正月封固山貝子三十年正月授宗人府左宗正三十五年二月

上征噶爾丹同都統喀岱等統領鑲藍旗營三十八年十

二月以情罷宗正任雍正元年三月改降襲固山貝子四年二月坐舉動狂悖削爵三月以魯賓無應襲貝子之人復降封輔國公乾隆八年六月卒年七十有四謚曰恪思

三次襲訥穆金顯榮貝勒喀爾楚渾元孫初喀爾楚渾孫魯賓以弟奉國將軍品級蘭鼐子宗智為嗣未襲卒訥穆金宗智第四子也乾隆九年四月降襲奉恩將軍二十五年十二月授三等侍衛累

遷至頭等侍衛四十八年十月卒年四十有四
四次襲薩賓圖奉恩將軍訥穆金第二子乾隆四
十九年五月襲封奉恩將軍

欽定四庫全書

卷九

多羅貝勒巴思哈傳

巴思哈

太祖高皇帝曾孫追封克勤郡王岳託第五子崇德四年
正月封鎮國將軍順治六年十月晉封多羅貝勒
九年七月流賊張獻忠餘黨孫可望等犯湖南隨
敬謹親王尼堪征之

賜蟒衣鞍馬弓矢十一月尼堪戰沒於衡州

命貝勒屯齊代其軍巴思哈合營三月由永州趨寶慶敗

賊兵十萬于周家坡十一年十月議隨敬謹親王
出征敗績罪削爵十二年三月任鑲紅旗滿洲都
統八月封鎮國公品級十五年正月隨信郡王多
尼征明桂王朱由榔于雲南合四川廣西兩路
軍期進取十一月抵貴陽趨安莊擊斬其衆十六
年正月大軍薄雲南省城同貝勒尚善等克鎮南
州王龍關永昌府騰越州六月

賜蟒袍鞍馬勞之十七年五月師旋七月議前征雲南時

撤永昌門兵致軍士入城擾民降鎮國將軍品級
十八年二月卒年三十

初次襲固克度渾原封貝勒巴思哈第二子順治
十八年六月降襲三等輔國將軍品級康熙四年
七月卒年十歲

二次襲庫布素渾原封貝勒巴思哈第三子康熙
四年九月降襲三等奉國將軍品級十二年正月
晉三等輔國將軍品級三十四年十月以病誤較

射削爵

三次襲蘭鼎原封三等輔國將軍品級庫布素渾
第一子康熙三十四年十月降襲三等奉國將軍
品級五十八年正月卒年四十有一

四次襲宗智奉國將軍品級蘭鼎第三子康熙五
十八年十二月降襲奉恩將軍品級雍正八年二
月授三等侍衛尋遷二等侍衛乾隆元年九月授
前鋒叅領四年十二月擢副都統八年十月卒年

四十有三

五次襲宗熹奉國將軍品級蘭鼎第六子乾隆九年七月降襲雲騎尉品級四十年十二月因軍政虛報年歲削級爵除

欽定宗室王公功績表傳卷九

欽定四庫全書

欽定宗室王公功績表傳卷十

傳八 貝子

固山貝子務達海傳

務達海

顯祖宣皇帝孫追封誠毅勇壯貝勒穆爾哈齊第四子天聰八年十二月授騎都尉崇德三年七月任刑部左叅政四年八月封三等輔國將軍五年二月任

鑲白旗滿洲副都統十一月隨鄭親王濟爾哈朗
圍錦州偵知敵于杏山塔山間運糧芻夜略之擒
斬甚衆七年六月擢刑部承政先是務達海隨貝
勒阿巴泰征明分略山東登州未至離衆先歸八
年七月部議削世職罷副都統任奪所賞俘獲

上祇命奪俘獲入官順治元年四月隨睿親王多爾袞入

山海關敗流賊李自成二年二月叙功晉封二等
輔國將軍四年正月以議鄭親王造府踰制罪贍

徇削世職六月晉一等輔國將軍九月晉三等鎮
國將軍五年四月同都統阿賴等戍漢中是年晉
封固山貝子六年四月同鎮國公屯齊哈輔國公
巴布泰往大同代英親王阿濟格討叛鎮姜瓖八
月

上仍命阿濟格赴大同務達海還京七年五月預議政八
年五月攝都察院事十一年十二月隨鄭親王世
子濟度討福建海寇鄭成功中途疾還京十二年

五月卒年五十有五諡曰襄敏爵除

固山貝子博和託傳

博和託

太祖高皇帝孫饒餘敏郡王阿巴泰第二子初封輔國公
崇德元年十二月

上親征朝鮮豫親王多鐸等先驅博和託隨軍圍其都進
圍南漢山城先後敗援兵二萬餘

上駐營城西博和託以所獲獻二年二月李倧降分
賜所俘三年八月隨睿親王多爾袞等征明由董家口入

略京西南六府至山西界移師山東克濟南四年

四月凱旋

賜銀二千兩六年三月隨鄭親王濟爾哈朗等圍明錦州
七年三月錦州下圍杏山七月駐防錦州十月隨
父阿巴泰征明入黃崖口攻薊州由河間景州進
克兗州八年六月凱旋

賜銀三千兩十月同輔國公芬古駐防錦州順治元年四
月隨睿親王入山海關破流賊李自成十月晉封

固山貝子三年五月隨豫親王勦蘓尼特部騰機
思騰機特等有功十月凱旋

優賜俘獲五年九月卒年三十有九謚曰溫良

初次襲彰泰溫良貝子博和託第四子順治八年
閏二月封鎮國公尋封固山貝子九年四月改襲
其父固山貝子康熙十三年春逆藩吳三桂陷湖
南

命順承郡王勒爾錦由荊州渡江勦賊別

勅貝勒尚善為大將軍規復岳州以彰泰叅贊軍務十五

年二月

諭責尚善暨彰泰進取遲延三月彰泰同尚善議分軍水
陸並進遣護軍統領額司泰等勦賊洞庭湖賊船
入南津港泊君山及由岳州出犯者皆敗之獲船
五十餘賊攢立柁樁於套湖峽口阻我舟大軍仍
駐陸十七年六月伐柁樁掉輕舟擊賊柳林嘴發
礮燬其船斃賊無算八月尚善卒於軍

詔以貝勒察尼代為大將軍授彰泰撫遠將軍九月師出
南津港賊船數十泊癩子山下令前鋒統領杭奇
提督桑額擊斃賊百餘獲船四十月敗賊於陸石
口連營白米灘絕賊舟師十八年正月岳州賊乏
食偽將軍陳珀偽總兵王度沖出降彰泰偕桑額
復華容石首二縣三月

詔彰泰會安親王岳樂軍於衡州七月由寶慶進征武岡
賊帥吳國貴據隘口我軍破斃國貴賊潰追至木

瓜橋殺賊甚衆十一月

命岳樂還京以彰泰代十九年三月奏都統穆占總督董
衛國等敗賊帥吳應麒復沅州降靖州及綏寧縣
附近各土司八月疏言將軍蔡毓榮奉有調遣漢
兵之

旨今進取貴州滿漢既合兵一路若調遣不相知恐礙事
機

上詔毓榮一切軍機關白大將軍酌行閏八月自沅州進

征十月距鎮遠十五里駐營賊據大路及兩山結
壘先令衛國等攻鎮遠衛關口穆占等截賊旁遁
隘口自與毓榮攻賊壘賊敗潰衛國奪取十向口
敗賊將張足法等於大巖門穆占躡賊至偏橋衛
賊由山徑竄遂復鎮遠府進定平越府及新添衛
直趨貴陽逆孽吳世璠與應麒等皆遁彰泰駐守
貴陽進復安順石阡都勻思南諸府十一月遣軍
復永寧州敗賊於安籠鋪追勦至鷄公背山鐵索

橋十二月疏言訶賊兵萬三千欲據盤江遣前鋒統領薩克察等率兵至鐵索橋諸處守隘

上以大兵秣馬貴陽已月餘

諭趣彰泰親統大兵撲賊進定雲南二十年正月渡盤江
偵賊將線絨等據普安縣之江西坡二月前驅至
沙子哨賊迎戰敗之彰泰督兵繼進抵臘茄坡賊
在江西坡者夜竄都統拉賽等追之復新興所逐
北三十里賊千餘還拒陣斬二百餘仍躡蹤疾追

復普安州時大將軍賴塔由廣西入雲南曲靖府
彰泰由普安進霑益州會嵩明州議合圍雲南省
城距城三十里賊將胡國炳劉起龍引衆萬餘列
象陣拒戰賴塔軍右彰泰軍左卯至午賊殊死戰
彰泰密遣前鋒統領沙納哈等衝其旁賊潰遁陣
斬國炳起龍及偽總兵九人俘獲無算彰泰與賴
塔毓榮等近歸化寺駐營令諸軍分布南壩薩石
衛走馬街雙塔寺得勝橋重關等處以扼其吭仍

廣宣招撫

勅諭於是大理臨安永順姚安武定諸偽官相繼詣軍門
降先是賊將馬寶胡國柱夏國相等掠四川聞雲
南圍急還救彰泰遣提督桑額都統希福勦賊楚
雄寶退據烏木山扼險拒希福擊敗其衆寶越山遁至
姚安知偽鎮將等俱先歸順乃乞降七月疏言馬
寶已投降夏國相黨羽解散奔竄廣南惟胡國柱
往鶴慶麗江尚未撲滅提督桑額都統希福追捕

逆賊情形與前不同臣等圍城兵力有餘頃聞將軍噶爾漢總督哈占自四川移師貴州將由威寧來雲南恐餉不敷臣等議令哈占兵還四川噶爾漢兵至日以廝役補缺兵量行減汰則餉不多糜圍城兵亦足用

詔哈占噶爾漢並旋師四川酌防要地餘皆遣歸彰泰又疏言馬寶屢經招撫不即悔罪投誠反奔尋甸攜妻子赴楚雄糾逆黨為大兵所敗窮蹙已極始率

衆不滿百人乞降莫贖其罪同時來降之偽將軍
巴養元鄭旺李繼業等應並羈禁候

旨九月希福至雲龍州國柱自縊死總兵李國標與土司
儂朋勦賊廣南圍國相於西板橋國相降彰泰奏
其罪與寶同並械送京十月彰泰與賴塔及將軍
趙良棟等破賊營於南壩得勝橋太平橋走馬街
賊竄入城大軍薄城環攻世璠自縊死偽將軍何
進忠林天擎線緘黃明等出降彰泰誠將士勿搶

掠令都統瑪奇穆占先入城撫民清理倉庫籍賊黨屬戮世璠屍函首馳獻

闕下雲南全省底定是年即軍前授宗人府左宗正
二十一年十月凱旋

上率王大臣至盧溝橋南二十里迎勞二十二年二月議
初征岳州遷延應以恢復貴州雲南功抵罪

命仍紀功封冊

賜金二十兩銀千兩二十四年九月以濫舉宗人府屬官

品行不端罷左宗正二十九年正月卒年五十有

五

二次襲屯珠貝子彰泰第三子康熙十一年正月
封鎮國公二十七年二月以庸懦降鎮國將軍二
十九年六月襲封鎮國公五十二年十月授宗人
府左宗正五十六年十月任禮部尚書五十七年
閏八月卒年六十有一

詔贈固山貝子諡曰恪敏

三次襲逢信恪敏貝子屯珠孫初屯珠子安詹殤
以兄百綬子文昭第三子逢信嗣安詹為子康熙
五十七年十二月降襲輔國公乾隆十二年八月
卒年四十有二諡曰恭恪

四次襲盛昌恭恪輔國公逢信第二子乾隆十二
年十二月襲封輔國公二十二年七月以侍班失
儀削爵二十三年二月封鎮國將軍十二月晉封
輔國公

固山貝子固爾瑪渾傳

固爾瑪渾

顯祖宣皇帝曾孫原封貝勒阿敏第三子崇德三年九月
隨睿親王多爾袞征明由北京至山西復東至濟
南克城四十餘四年四月凱旋

賜馳一馬一銀二千兩是年封輔國公先是內大臣多爾
濟所屬蒙古及漢人盜馬自伊嚕逃

命同鎮國公扎喀納等伺諸藩城屏城間既望見以淖不

追而還八月議削爵

旨免之五年六月以父阿敏罪削爵黜宗室順治五年閏
四月復入宗室封輔國公六年正月隨鄭親王濟
爾哈朗征湖廣擒何騰蛟於湘潭進師永興奪門
入固爾瑪渾俱在事有功凱旋

賜銀六百兩十月晉封固山貝子康熙二十年十月卒年
六十有七諡曰溫簡

初次襲瓦三溫簡貝子固爾瑪渾第四子康熙四

年正月封三等輔國將軍十三年十月隨安親王
岳樂征江西進定湖廣十八年十一月還京二十
年十二月降襲輔國公二十一年八月授宗人府
右宗人二十二年三月議瓦三前在長沙退縮罪
削爵得

旨瓦三才具甚優况其公爵乃伊父貝子固爾瑪渾効力
年久恩賜之爵著革去右宗人從寬留其公爵二十三
年四月任鑲藍旗蒙古都統五月調鑲藍旗滿洲

都統先是俄羅斯竊據雅克薩尼布潮二城

上諭黑龍江將軍薩布素收其田禾以困之薩布素以失

機請罪是年

命瓦三偕侍郎果丕會薩布素議雅克薩應否攻取嗣奏

我兵於來年四月抵雅克薩招撫不就撫則攻其

城萬一難取即遵前

旨毀田禾以歸

上命都統朋春等會勦十二月議政王大臣奏請黑龍江

將士應遣大臣統轄得

旨軍機關係緊要非熟練戎行者不可公瓦三素諳行師
遣往必能勝任護軍統領佟寶佛可託皆堪効力之人
可令公瓦三統轄之二十四年正月卒年三十有五謚
曰襄敏

二次襲齊克塔哈襄敏輔國公瓦三第二子康熙
二十四年正月襲封輔國公三十二年十二月任
宗人府右宗人三十五年正月從

上征噶爾丹同護軍統領鄂克濟哈統領正紅旗營三十
九年四月濬永定河齊克塔哈分董其事四十年
正月任正黃旗蒙古都統四十六年五月以鑽營
削爵

三次襲鄂斐溫簡貝子固爾瑪渾孫鎮國公瑪爾
圖第四子康熙六年三月封三等奉國將軍三十
三年五月任鑲藍旗蒙古副都統三十五年正月
從

上征噶爾丹同康親王傑書等統領鑲藍旗營三十八年
九月調正紅旗蒙古副都統三十九年十二月調
正黃旗滿洲副都統四十年二月擢正黃旗漢軍
都統九月調正黃旗滿洲都統四十一年九月授
領侍衛內大臣四十六年六月襲封輔國公四十
七年七月任宗人府左宗人五十二年八月卒年
六十有一

四次襲鄂齊輔國公鄂斐第五子康熙三十八年

八月封奉恩將軍四十八年二月以事削爵尋授散秩大臣雍正三年五月任正黃旗漢軍副都統十一月以陝甘總督岳鍾琪奏將羅隆宗諸部給達賴喇嘛管理遣大臣往諭

命鄂齊偕學士班第會提督周瑛詳細妥辦嗣鄂齊奏言臣至西藏審視情形首領辦事者互不睦請降

旨諭達賴喇嘛等和衷共事

詔允之十二月

上諭鄂齊自委任以來竭力行走差往西藏辦事明白著將伊父鄂斐未襲輔國公爵給與承襲四年十月擢鑲黃旗漢軍都統五年七月晉鎮國公十一月調天津水師營都統六年九月以兵丁滋事削爵授三等侍衛効力七年二月任正紅旗滿洲副都統十月奏請八旗訓練必弓箭相稱嫻熟中的為要除官射用披子箭外常演俱用髑頭則指發與眉針箭同視製披子箭價省議如所奏九年八月署鑲

紅旗蒙古都統十一年正月革任爵除

固山貝子洛託傳

洛託

顯祖宣皇帝曾孫追封和惠貝勒寨桑古第一子天聰八年八月從

上征明有功籍所俘獻于大同南西岡

御營崇德元年封固山貝子十二月從征朝鮮同貝勒多鐸圍南漢山城殲援兵八千又敗其援兵五千二

年四月

命議政四年二月隨英親王阿濟格圍明塔山連山五年
六月隨睿親王多爾袞屯田義州九月錦州兵夜
襲我鑲藍旗營同鎮國公屯齊擊敗之六年三月
以圍錦州時不臨城及私遣兵回議削爵

詔罰鍰八月

上征松山大敗明總督洪承疇兵洛託橫擊其潰軍於塔
山十一月復圍錦州七年三月隨鄭親王濟爾哈
朗駐塔山四月克之六月任都察院承政九月同

貝子博洛尼堪駐錦州八年八月家人都塔里訐其陰事勘實

上以其悖亂違法重撻之削爵幽禁順治八年三月復封三等鎮國將軍十三年五月

諭吏部三等鎮國將軍洛託當

太宗時曾犯大罪因愛其才且係宗室特加寬宥今值國家用人之際久令閒住深為可惜著補授鑲藍旗滿洲都統時川寇餘孽孫可望李定國馮雙禮並叛賊岳州

總兵馬進忠俱受明桂王朱由榔封爵可望據黔
擾湖南十四年四月

命洛託為寧南靖寇將軍駐防荊州與經略洪承疇商度
勦撫至則遣兵攻取心潭隘斷巴東渡口可望所
屬偽總兵趙世超偽副將趙三才等降十二月可
望與定國內訌戰不勝亦來降

命同都統濟席哈由湖南進取貴州十五年三月會承疇
師於常德抵辰州收復沅陵瀘溪麻陽黔陽淑浦

諸縣進軍沅州進忠遁檄偏沅巡撫袁廓宇招撫靖州並屯鎮遠二十里山口堵禦是日雙禮遣偽總兵馮天裕閻廷桂等先後自平越降四月大軍至貴州由榔之總兵羅大順復收潰卒襲新添衛城敗之洛託與承疇守貴陽十六年二月凱旋叙功授雲騎尉晉一等鎮國將軍十七年七月

命為安南將軍同尚書車克內大臣達素都統索渾征海寇鄭成功大破賊衆十一月師還康熙四年四月

卒年五十

初次襲富達禮原封貝子洛託第七子康熙四年
九月襲洛託軍功所得騎都尉世職十二月改降
襲奉恩將軍八年七月晉一等輔國將軍二十三
年正月任頭等侍衛二十五年四月授散秩大臣
十一月以諂領侍衛內大臣索額圖恃勢致富為
其從弟蘇起所訐削爵除

固山貝子傅喇塔傳

傅喇塔

顯祖宣皇帝曾孫追封靖定貝勒芬古第四子順治二年

二月封輔國公十一月隨順承郡王勒克德渾征

湖廣凱旋

賜金五十兩銀千兩五年九月復隨鄭親王濟爾哈朗征

湖廣追勦至廣西凱旋

賜銀六百兩六年十月晉封固山貝子十六年二月以朝

叅失儀降輔國公十八年三月復封固山貝子康熙十三年六月逆藩耿精忠反

命為寧海將軍偕奉命大將軍康親王傑書討之師至浙江溫州處州已陷王駐金華傅喇塔進師台州十二月偽都督曾養性偽總兵陳理屯黃瑞山擊之斬偽副將陳鵬等賊犯天台復破之紫雲山九里寺山十四年八月養性與叛鎮祖宏勲復犯台州遣副都統吉勒塔布自仙居襲其後疾馳至半山

嶺破偽都督劉邦仁乘勝進攻黃巖至黃土嶺賊迎拒大破之遂圍其城養性遁偽副將朱鎮山以城降進敗賊于上塘嶺及小河渡先後復太平樂清青田三縣及大荆盤石二營十月攻溫州敗賊于南江十五年二月賊水陸四萬餘犯我軍遣吉勒塔布等分路迎擊陣斬偽都督孫可得偽總兵李節等三百餘員賊二萬餘初傅喇塔之攻溫州也始以俟紅衣礮為辭繼云須戰船康親王疏

聞

諭責其前後言互異負委任

命剋期取溫三月傳喇塔疏言臣屢奉康親王檄促心思
惶惑以致語言違謬但臣前駐台州王以俟台州
破進閩臣得黃巖又云候取溫州以是責臣何辭
相抵今蒙

皇上寬恩惟勒期速下溫州臣敢不力戰自効但環溫皆
水我兵不能猝進疏入

命康親王量留兵圍溫州親統大軍由衢州進取福建仍

頌

諭曰王貝子皆朕懿親受任討賊師克在和近覽王貝子
章奏似不相和睦嗣後務同心一志合謀合力以奏膚
功是月傅喇塔亦留兵圍溫州偕吉勒塔布勦處州賊
以入閩六月師過三角嶺源甌江將抵得勝山養
性等聯數百艘江中復立兩營于對山及得勝山
下之古溪分扼水陸遂遣吉勒塔布及總兵陳世

凱等攻古溪伏兵林中邀賊歸路賊敗遇伏截殺賊船並對江營皆為我漢軍礮碎水陸俱潰進師溫溪渡口敗偽都督馬成龍兵降其都司以下各偽官尋會康親王軍于衢州八月偽都尉連雲登據雲和縣石塘嶺遣副都統穆赫林連破二十八營殺賊七千餘復雲和九月大兵抵福建耿精忠降浙江諸寇悉平十一月卒于軍年五十有五喪還

特遣內大臣公頗爾盆至天津迎奠謚曰惠獻十七年七

月

諭宗人府貝子傅喇塔係宗室懿親躬履行間勦禦賊寇
撫綏兵民勲猷懋著積勞薨逝深為可憫理應優卹以
示朕酬庸之意不拘定例著封其子富善仍為固山貝
子次子福存為鎮國公乾隆五年十二月入祀浙江賢
良祠六年四月復入祀福建賢良祠十五年七月
以孫德沛襲封和碩簡親王贈如其爵

初次襲富善惠獻貝子傅喇塔第二子康熙六年正月封鎮國公十七年七月襲封固山貝子十九年十一月任宗人府右宗正二十四年九月轉左宗人二十九年十二月以病乞解任

諭責富善所行乖亂有負眷念交宗人府嚴行議處削爵二次襲福存惠獻貝子傅喇塔第五子康熙十七年七月封鎮國公三十年十月襲封固山貝子三十九年九月卒年三十有六乾隆十五年七月以

子德沛襲封和碩簡親王贈如其爵

三次襲德普貝子福存第二子康熙三十九年十月降襲鎮國公雍正元年四月任宗人府右宗人五月轉左宗人十月授正黃旗滿洲都統尋預議政七年五月卒年四十有七

四次襲恒魯鎮國公德普第一子雍正七年八月降襲輔國公乾隆七年四月授散秩大臣十年二月授正紅旗漢軍副都統五月授鑲藍旗護軍統

領十三年閏七月授工部侍郎十五年五月授宗人府右宗人九月轉左宗人二十四年六月授綏遠城將軍二十五年九月調吉林將軍三十四年正月調

盛京將軍三十七年正月授內大臣六月卒年五十有一諡曰恭愍

五次襲興兆恭愍輔國公恒魯第二子乾隆三十年十二月封二等輔國將軍三十七年十月襲封

奉恩輔國公尋授正藍旗護軍統領是月奉

旨興兆著授為領隊大臣出征金川旋授宗人府右宗
人三十九年勦賊于當噶拉得里絨布寨卡卡角
庚額特等處九月即軍前授荊州將軍四十年大
軍進征得楞基木斯丹當噶薩克薩谷甲雜獨古
木等處興兆並在事有功得頭等功牌六三等功
牌二金川既平

命圖像

紫光閣

御製贊曰憶當國初創業開基宗室王公宣力率師承
平襲慶安享榮華董軍建勲斯為可嘉四十一年

二月回荊州任

固山貝子穆爾祜傳

穆爾祜

太祖高皇帝曾孫安平貝勒杜度第二子天聰九年五月命隨貝勒多鐸率偏師入寧遠錦州界以制明俾毋援山
西穆爾祜在事有功崇德元年封輔國公六年八月從

上圍松山明兵遁穆爾祜率騎兵追擊七年十月以怨望
削爵黜宗室順治元年十月隨豫親王多鐸南征

破流賊李自成于潼關先後拔兩營賊犯我前鋒
兵同叅領鄂博敗之我軍設伏近山賊自山來襲
擊敗其衆二年二月復入宗室封三等鎮國將軍
三年正月叙功晉一等鎮國將軍五月隨豫親王
征蘇尼特部騰機思騰機特等有功四年三月復
封輔國公六年正月大同總兵姜瓖叛

命同敬謹親王尼堪等討之十月晉封固山貝子九年七
月復隨敬謹親王征湖南

賜蟒衣鞍馬弓矢師至衡州敬謹親王戰沒

上命貝勒屯齊代其軍穆爾祜合營三月明桂王朱由榔之秦王孫可望自寶慶與偽都督馮雙禮軍會我師擊敗之獲馬七百十一年十月議隨敬謹親王戰沒罪削爵

初次襲長源原封貝子穆爾祜第二子順治十六年三月降襲三等鎮國將軍品級康熙三十四年九月以病削爵

二次襲察爾岱原襲三等鎮國將軍品級長源第
四子康熙三十四年十月降襲三等輔國將軍品
級雍正十一年八月卒年四十有五

三次襲諾爾博三等輔國將軍品級察爾岱第三
子雍正十二年三月降襲三等奉國將軍品級乾
隆二十五年十一月以病乞休二十六年十二月
卒年四十有二

四次襲鳳文三等奉國將軍品級諾爾博第四子

乾隆二十五年十二月降襲奉恩將軍品級四十年十一月授三等侍衛五十年二月授護軍叅領

固山貝子特爾祜傳

特爾祜

太祖高皇帝曾孫安平貝勒杜度第三子崇德四年八月
封輔國公六年三月隨大軍圍錦州敗明兵于松
山杏山間七年三月明總兵祖大壽降特爾祜移
師駐塔山尋克之十月以怨望削爵黜宗室順治
元年四月隨睿親王多爾袞入山海關破流賊李
自成追擊至望都十一月隨豫親王多鐸敗流賊

于潼關二年二月復入宗室封輔國公十月叙功
賜金五十兩銀二千兩六年十月晉封固山貝子十五年

二月卒年四十諡曰恪僖

初次襲噶爾哈圖恪僖貝子特爾祜第二子順治
十八年七月降襲鎮國公康熙二年十一月卒年
十有一

二次襲登塞恪僖貝子特爾祜第三子康熙三年
三月降襲輔國公十二年六月登塞以貝子之子

應襲鎮國公呈請改襲得

旨登塞著授為鎮國公六十一年十二月任宗人府左宗人雍正元年三月以老乞休二年九月卒年七十有一謚曰恪恭

三次襲瑟爾臣恪恭鎮國公登塞第十一子康熙五十五年正月授三等侍衛四月封三等鎮國將軍五十七年五月授頭等侍衛雍正二年十二月降襲輔國公四年二月任鑲藍旗蒙古都統四月

任宗人府右宗人五年八月攝鑲紅旗漢軍都統
九年三月管正白旗覺羅學乾隆五年十一月轉
左宗人十五年八月卒年五十有六諡曰溫僖

四次襲額爾經阿溫僖輔國公瑟爾臣第八子乾
隆十五年十二月襲封奉恩輔國公二十年八月
卒年二十

五次襲德明阿溫僖輔國公瑟爾臣第二子乾隆
二十一年二月襲封奉恩輔國公三月授散秩大

臣二十二年十月以庸情削爵

六次襲德尊原襲奉恩輔國公德明阿第三子乾隆二十三年四月降襲三等鎮國將軍

固山貝子薩弼傳

薩弼

太祖高皇帝曾孫安平貝勒杜度第七子崇德七年十月
以兄杜爾祜穆爾祜特爾祜怨望削爵黜宗室薩
弼亦從坐順治元年四月隨睿親王多爾袞入山
海關破流賊李自成二年二月復入宗室封輔國
公三年正月隨順承郡王勒克德渾征流寇一隻
虎於荊州屢敗賊衆凱旋

賜金五十兩銀千兩初大同總兵姜瓖叛郡縣多應之六年十月同親王滿達海勦賊於朔州寧武並有功

十月

詔還京晉封固山貝子十二年二月卒年二十有八謚曰

懷愍

初次襲固鼎懷愍貝子薩弼第二子順治十二年

八月降襲鎮國公十五年三月卒年六歲謚曰悼

愍

二次襲巴鼐懷愍貝子薩弼第一子順治十八年七月襲封鎮國公康熙二十三年正月卒年三十有三

三次襲阿布蘭鎮國公巴鼐第三子康熙二十三年四月降襲輔國公五十七年四月授宗人府右宗人十月轉左宗人五十八年十二月任鑲藍旗滿洲都統五十九年四月

命議政六十一年十一月遷右宗正雍正元年三月奉

上諭公阿布蘭人謙和自

皇考任用以來所交事務一心勤慎効力晉封多羅貝勒
二年五月以奏事不敬降輔國公五年閏三月坐
擅以

玉牒底本私示隆科多削爵

四次襲法爾善鎮國公巴鼐孫三等輔國將軍法
布蘭第一子雍正五年五月襲封輔國公乾隆五
年閏六月卒年四十有七諡曰和愍

五次襲祿慶和愍輔國公法爾善第二子乾隆五
年十一月襲封奉恩輔國公二十三年十一月坐
守護

陵寢儀樹不謹降三等鎮國將軍二十七年四月卒年四
十有二

六次襲倫成三等鎮國將軍祿慶第一子乾隆二
十七年九月襲封三等鎮國將軍

固山貝子蘇布圖傳

蘇布圖

太祖高皇帝曾孫追封賢懿貝子尚建第一子初封輔國公順治二年七月隨貝勒勒克德渾駐防江寧十
二月移師征湖廣三年正月至武昌破流賊餘黨
一隻虎等事詳順承恭惠郡王傳凱旋

頒賚有功將士蘇布圖得

賜金五十兩銀一千兩尋晉封固山貝子五年九月隨鄭親

王濟爾哈朗征湖廣十一月卒于軍年二十有四諡
曰悼愍爵除

固山貝子溫齊傳

溫齊

顯祖宣皇帝元孫鎮國公品級屯齊第一子順治六年十月封固山貝子康熙十三年三月授宗人府右宗人四月授鑲藍旗滿洲都統是年四川叛應逆藩吳三桂

命隨定西大將軍貝勒洞鄂由陝西進征時陝西提督王輔臣叛大軍駐漢中敗賊于仙逸關復關山關及

秦州禮縣追勦至西和復清水伏羗事詳信郡王
傳十六年二月

上以洞鄂等久屯平涼無功削洞鄂爵溫齊降輔國公革
都統及右宗人嗣三桂陷湖南安遠靖寇大將軍
貝勒尚善規復岳州九月

命溫齊統京兵往叅贊軍務十七年六月敗賊于柳林嘴
君山八月尚善卒于軍貝勒察尼代仍以溫齊為
叅贊十月敗賊於陸石口進擊岳州克之十八年

欽定宗室王公功績表傳卷十